



## Aadie Europa

Gärn sitz i dunde am Haafe bim Rhy und träum vo Europa  
D Insle im Ruggen wo bald – uff de Plän - wie Manhattan nimmt Gschalt a  
D Schiff bringe Gieter vo überall häär, und Mensche und Gschichte,  
Saage vo jetzt und vo friehner, won drüber i will brichte.

Zeus stoht am Aafang. Als Schtier schnappt är fräch em syrische König  
D Tochter Europa, treit si in fremdi Länder, isch seelig.  
Söhn hän si zwei, und „Europa“ soll me däm Kontinänt sage:  
Dr Namme als Zeiche vo Glück in die ganzi Wält usetrage.

Immer hetts nit funktioniert, isch us hüttiger Warte z'beduure,  
Mord und Totschlag hetts meischtens denn gäh, wenn rundumme Muure  
Gräbe und Gränze „in“ gsi sin. Friide und Wohlstand drgääge,  
Die sinn gwachse us Zueversicht, Ustusch und gemeinsame Wääge.

Hütte stoht s Glück vo Europa uff dr scharfe Site vom Mässer:  
Alles voll Bange, d Bezeichnig „Pulverfässer“ wär besser,  
Vollstopft mit fuule Kredit, verschuldet vo gierige Bängger,  
uff Koschte vo Volgg und vo Staate, und die wärde ärmer und grängger.

Fascht gseht me in däre Tragik griechischi Dimensione:  
Ospel und Grübel & Co – Bängger us alle Regione  
Fiehre sich uff als Wälte-Beherrscher, wo führt das no ane?  
Master of all Universum sind hüt was friehner Titane.

Gäld entspricht däm wo domols isch s FÜR gsi: Usser Kontrolle  
Bringe uns Swaps, Derivat, Hypotheke total vo dr Rolle.  
Wie dr Prometheus dr Wille vom Zeus und de Götter hett bschisse,  
So hänn d Privat- de Zentralbange d Währigshoheit entrisse.

Hett no dr Zeus dr Prometheus befohle in Kettene z'quäle  
Wurde sich hütte für d Bange strängeri Regle empfähle.  
D Strof vo däm Adler wo d Läbere pigge duet diemer is schängge,  
Falls d Chefetage wieder afoht aschtändig tigge und dängge.

Schulde vo Bangge zahle, in dämm mir alli mien spaare  
Wär s glich wie fahre mit Rösser umgekehrt gschpannt vore Kaare.  
Nötig wär viel me d Vision vo dr Grächtigkeit ufrächt erhalte  
S könnt sogar si dass eso Europa dr Euro könnt bhalte.

Z Herrliberg wohnt none bsundere Fall, dr Blocher dä Gleezi  
Kämpft gege Hildebrand dangg sine gheime Privatbanggespeezi,  
Säit flissig Zwietracht und spilt mitem Fүүr, das selbstgrächti Wääse.  
Söll är doch gscheiter Gotthelf für sich und Hexameter lääse.

Aadie Europa – am Ufer vom Rhy, e Frachter schloht Wälle –  
Isch das e Gruess oder Abschied? Das Urteil kann i nit fälle.  
Ai Frog dergääge, die losst – numme mir? – scho länger kei Rue:  
Zelle sich Basel und d Schwyz zu Europa sälber derzue?